

- प्रधानमंत्री नरेंद्र मोदी एआई इम्पैक्ट समिट ने आर्टिफिशियल इंटेलिजेंस रा हलका मांय विश्व खातर महताऊं बताया।
- प्रधानमंत्री आकाशवाणी ऊं 'मन की बात' कार्यक्रम मांय देश मांय अंगदान री कानी जागरुकता बढ़बा री सरावणा करता थकां सीकर रा रामदेव सिंह रो जिकर कर्या।
- केन्द्रीय कानून मंत्री अर्जुन राम मेघवाल कयो-केन्द्र सरकार देशभर मांय साईबर सुरक्षा जागरुकता ने मजबूत करबा खातर बचनबद्ध है।
- जयपुर मांय व्हीया एयर शो मांय भारतीय वायुसेना रो शौर्य निजर आयो-सूर्यकिरण विमान अर सारंग हेलीकॉप्टर हैरतअंगेज करतब दिखाया।

000

प्रधानमंत्री नरेंद्र मोदी कया के इंडिया एआई इम्पैक्ट समिट भविष्य मांय विश्व स्तर माथे एआई री शक्ति रा इस्तेमाल री दिशा मांय महताऊ पड़ाव साबित व्हीयो है। आकाशवाणी ऊं मन की बात कार्यक्रम मांय प्रधानमंत्री बताया के समिट खातर नुवी दिल्ली मांई केई देशां रा नेता, उद्योगपति, नवप्रवर्तक अर स्टार्टअप हलका सूं जुड़या लोग भेळा व्हीया। इण समिट मांय दुनिया ने एआई रा हलका मांय भारत री अद्भुत क्षमतावां देखबा ने मिली। इण दौरान भारत तीन मेड इन इंडिया एआई मॉडल भी लांच कर्यो। आ समिट हाल तांई री सब ऊं बड़ी एआई समिट ही। श्री मोदी कया के इंडिया एआई प्रदर्शनी मांय विश्व नेतावां ने कई वस्तुआं दिखायी।

000

प्रधानमंत्री समिट री सफलता खातर देशवासियां ने बधाई दी। श्री मोदी कया के हाल रा टी-20 क्रिकेट विश्व कप मांय कनाडा, अमरीका, ओमान, न्यूजीलैंड, संयुक्त अरब अमीरात अर इटली री टीमां मांय भारतीय मूल रा केई खिलाड़ी हैं। वे कया के भारतीय जठे भी जावे है, आपरी मायड़ री जड़ां सूं जुड़या रहवे है। साथे ही आपरी कर्मभूमि यानि जिण भी देश मांय रहवे है, उण रा विकास मांय इमदाद करे है। अंगदान माथे बात करता थकां श्री मोदी कया के देश मांय अंगदान कानी ऊं लोगां रो रुझान लगातार बढ़ रियो है। वे कया के एक नेक काम केई जीवन बदल सके है। इण दौरान वणा सीकर रा रामदेव सिंह री किडनी ट्रांसप्लांट रो भी जिकर करया।

000

प्रधानमंत्री मोदी साइबर सुरक्षा री बात भी करी। वे कया के 'मन की बात' मांय डिजिटल अरेस्ट अर डिजिटल धोखाधड़ी माथे वां रा भाषण रे पछे समाज मांय इण दिशा मांय काफी जागरुकता आई है।

000

श्री मोदी बताया के राष्ट्रपति भवन मांय काल सूं राजगोपालाचारी उत्सव मनाये जावेला। एक मार्च तांई चालबा वाळा इण उत्सव रे दौरान राष्ट्रपति भवन मांय स्वतंत्र भारत रा पेली वाळा गवर्नर जनरल सी. राजगोपालाचारी री प्रतिमा रो अनावरण व्हेला। प्रधानमंत्री आस जताई के पढणियां तनाव सूं दूरी बणा र पूरी लगन सूं आपरी परीक्षावां री तैयारी कर रह्या है।

000

प्रधानमंत्री नरेन्द्र मोदी रमजान अर होळी रा त्यौहार री देशवासियां ने शुभकामनावां दी। वणा 'वोकल फॉर लोकल' रो मंत्र भी दोहराया। अठी ने प्रदेश मांय भी मन की बात कार्यक्रम रे चालता लोगां मांय खास उच्छाव निजर आयो। मुख्यमंत्री भजनलाल शर्मा वाटिका स्थित पंडित दीन दयाल उपाध्याय सामुदायिक केन्द्र मांय आम लोगां रे सागे मन

की बात कार्यक्रम सुण्या। इण मौके सांसद मंजू शर्मा, विधायक कैलाश वर्मा समेत जनता रा केई नुमाइंदा अर कार्यकर्ता मौजूद रिया।

000

लोकसभा अध्यक्ष ओम बिरला आज कोटा मांय मथुराधीश मंदिर कोरिडॉर रा पैला फेर रा विकास कामां री नींव राख्यी। इण खासी परियोजना मांय सड़कां ने चौड़ो करणो, मन्दिर परिक्रमा मारग रो सौंदर्यकरण, पार्किंग सुविधा बढाणो अर यात्रियां खातर होटल बणाबा रो काम भेळो है। इण माथे कोई सवा 66 करोड़ रोकड़ा खर्च व्हेला। इण मौके श्री बिरला कया के सरकार मुश्तैदी रे सागे आस्था रा केन्द्रां रो पुनर्विकास करेला।

000

श्री बिरला आज कोटा महोत्सव रे तैत हैरिटेज वॉक मांय भी शामिल व्हीया।

000

केन्द्रीय कानून मंत्री अर्जुन राम मेघवाल कयो के केन्द्र सरकार साईबर सुरक्षा जागरूकता ने मजबूत करबा अर तकनीक आधारित पारदर्शी सुलभ न्याय व्यवस्था बणाबा खातर बचनबद्ध है। वे आज राजस्थान राज्य विधिक सेवा प्राधिकरण री कानी ऊं जयपुर मांय साईबर सुरक्षा माथे आधारित तीन दिन रा राष्ट्रीय न्यायिक सम्मेलन रा समापन सत्र ने संबोधित कर रिया हा। वणा कया के सम्मेलन सूं साईबर अपराध सूं प्रभावी सुरक्षा अर पीडितां ने बेगी अर मुफ्त विधिक सहायता मुहैया कराबा मांय इमदाद मिलेला। श्री मेघवाल कया के सम्मेलन रे दौरान महिलावां, टाबरां अर उम्रदराज नागरिकां खातर सुरक्षित डिजिटल वातावरण पक्को करबा माथे चर्चा व्ही।

0000

जयपुर मांय जल महल री पाल माथे आज भारतीय वायुसेना री कानी ऊं एयर शो राख्यो गयो। इण शो मांय सूर्यकिरण विमान अर सारंग हेलीकॉप्टर हैरतअंगेज कलाबाजियां दिखाई। इण दौरान पांच सारंग हेलीकॉप्टर री टीम आसमान मांय केई आकृतियां बणा र सगळा ने रोमांचित कर दीनो। एयर शो सूं पहली कार्यक्रम ने संबोधित करता थकां मुख्यमंत्री भजनलाल शर्मा भारतीय वायुसेना रा साहस अर शौर्य री सराहवणा करी।

000

कार्यक्रम मांय राज्यपाल हरिभाऊ बागडे, उपमुख्यमंत्री दीया कुमारी अर वायु सेना रा अधिकारी, प्रशासनिक अधिकारी अर घणी तादाद मांय लोग मौजूद रिया।

000

प्रधानमंत्री नरेंद्र मोदी 28 फरवरी ने अजमेर आवेला। वां रो कायड़ विश्रामस्थली सूं जनसभा ने सम्बोधित करबा रो कार्यक्रम है। श्री मोदी रा इण प्रस्तावित दौरा रे चालता आज सभा री ठौड़ माथे विधिवत भूमि पूजन करयो गयो। इण मौके विधानसभा अध्यक्ष वासुदेव देवनानी, केन्द्रीय कृषि राज्य मंत्री भागीरथ चौधरी, जल संसाधन मंत्री सुरेश रावत समेत जनता रा केई नुमाइंदा अर प्रशासनिक अहलकार मौजूद रिया। श्री देवनानी सभा री ठौड़ री व्यवस्थावां रो जायजो कर अहलकारां ने जरूरी निर्देश दिया। खबरनवीसां सागे बातचीत मांय केन्द्रीय मंत्री भागीरथ चौधरी बताया के प्रधानमंत्री इण दौरान प्रदेश ने केई सौगात देवेला।

000

निर्वाचन आयोग री कानी ऊं काल नई दिल्ली मांय राज्य चुनाव आयुक्तां रे सागे सम्मेलन कर्यो जावेला। मुख्य निर्वाचन आयुक्त ज्ञानेश कुमार सम्मेलन री अगुवाई करेला। सम्मेलन मांय, राज्य निर्वाचन आयुक्त आपरा कानूनी अर तकनीकी विशेषज्ञां अर सगळा राज्यां अर केन्द्र रा राज वाळा प्रदेशां रा मुख्य चुनाव अधिकारी भेळा व्हेला। सम्मेलन रो लगस निर्वाचन आयोग अर राज्य निर्वाचन आयुक्तां रा कामकाज मांय तालमेल ने बढावो देणो है। सम्मेलन मांय प्रौद्योगिकी, ईवीएम अर मतदाता-सूची साझा करबा माथे चर्चा व्हेला।

000

सीकर जिला रा खाटूधाम मांय राख्या बाबा श्याम रा फागुणी मेळा रा दूजा दिन मोटी तादाद मांय लोग पूग्या। इण मौके श्याम बाबा रो खास गुलाबी सिणगार कर्यो गयो। बंगाल सूं मंगवाया गया गुलाबी फूलां समेत देश-विदेश रा 108 भांत रा फूलां ऊं दरबार ने सजायो गयो। मेळा री सरुआत रे सागे ई खाटू नगरी मांय भण्डारां अर सेवा शिविरां री लड़ी सरु व्हे ग्यी। रींगस-खाटू पदयात्रा मारग समेत पूरा हलका मांय दर्जनों सेवा शिविर चाल रह्या है। अठी ने राजधानी जयपुर सूं व्हे र निकळ री पदयात्रावां सूं रास्ता री न्यारी ही रौनक है। मुख्यमंत्री भजन लाल शर्मा आज अम्बाबाडी रे कने खाटूश्याम जी जा रह्या पदयात्रियां सूं मुलाकात करी।